

forteresse au dessus qui seroit imprenable, mais les choses ne se font qu'avec le temps, il faut penser aux choses plus necessaires les premieres, y passer des familles pour cultiuer, & des Religieux pour trauailler à la conuersion des Sauuages que l'on tient fort sages dans leur barbarie, & fort honnestes & posez en leur conuersation. Au reste accommodez en leurs vestemens & cheuelure comme les Montagnais & autres Sauuages de la Terre neuue.

Estans entrez dans le Golfe ou grande baye S. Laurens, nous trouuames dès le lendemain matin ce tant renommé Rocher que Dieu a estably & pozé au milieu de ce Golfe, pour la retraite d'une infinie multitude d'oyseaux de diuerses especes qui le couurent partout en telle quantité qu'on ny scauroit presque poser le pied, sans marcher sur lesdits oyseaux, sur leurs nids, ou sur leurs œufs.

Ceste voliere ainsi establie par la diuine prouidence, est esloignée dix-sept ou 18. lieuës du Cap Breton, & sous la hauteur d'environ 47. degrez & trois quarts. Il est plat au dessus un peu en talus, coupé à l'entour* comme une muraille, de circuit environ une petite lieuë, en forme ouale & difficile à monter. Nous auions proposé d'y aller querir des oyseaux s'il eut fait calme, mais la mer un peu trop agitée nous en empescha & priua de ce contentement.

142 Quand il y fait vent les oyseaux s'esleuent facilement de terre, autrement il y a de certaines especes qui ne peuuent presque voler, & qu'on peut aysement assommer à coup de bastons, comme auoient faits les Matelots d'un autre Nauire, qui auant nous en